



ӨМНӨГОВЬ АЙМАГ
ГУРВАНТЭС СУМЫН ИРГЭДИЙН ТӨЛӨӨЛӨГЧДИЙН
ХУРЛЫН ХУРАЛДААНЫ ТОГТООЛ

2016 оны 12 сарын 16 өдөр

Дугаар 2/03

Урт

Сумын Иргэдийн төлөөлөгчдийн хурлын
2017-2020 оны үзэл баримтлал батлах тухай

Монгол улсын Засаг захиргаа нутаг дэвсгэрийн нэгж, түүний удирдлагын тухай хуулийн 18 дугаар зүйлийн 18.1.2-ийн "ж" дахь заалтыг үндэслэн сумын Иргэдийн төлөөлөгчдийн хурлын хуралдаанаас ТОГТООХ нь:

1. Сумын Иргэдийн төлөөлөгчдийн хурлын 2017-2020 оны үзэл баримтлалыг хавсралтаар баталсугай.

2. Үзэл баримтлалыг сумын хэмжээнд хэрэгжүүлэх ажлыг зохион байгуулж, сумын нийгэм, эдийн засгийг хөгжүүлэх үндсэн чиглэлд тусган хэрэгжилт, үр дүнг тооцож ажиллахыг сумын Иргэдийн төлөөлөгчдийн хурлын Тэргүүлэгчид, ажлын албанд үүрэг болгосугай.

ХУРЛЫН ДАРГА



Б.ОТГОНБАЯР

Сумын Иргэдийн Төлөөлөгчдийн Хурлын
2016 оны 12 дугаар сарын 16-ны өдрийн
хуралдааны 2/03 дугаар
тогтоолын хавсралт



ГУРВАНТЭС СУМЫН ИРГЭДИЙН ТӨЛӨӨЛӨГЧДИЙН ХУРЛЫН 2017-2020 ОНД БАРИМТЛАХ ҮЗЭЛ БАРИМТЛАЛ

Нийтлэг үндэслэл

Орон нутгийн 7 дахь удаагийн сонгуулийн үр дүнгээр байгуулагдсан иргэдийн Төлөөлөгчдийн Хурал нь орон нутгийн хөгжлийн ойрын ба хэтийн төлөвийг тодорхойлон, шийдвэрлэхэд хамт олны бүтээлч санаачлага, иргэдийн идэвхтэй оролцоонд тулгуурлах зарчмыг баримтлан ажиллана.

Монгол Улсын Үндсэн хуулийн 62-р зүйлийн 2-т “Хэрэв нутаг дэвсгэрийн амьдралын тодорхой асуудлыг шийдвэрлэх талаар хууль, төрийн зохих дээд байгууллагын шийдвэрт тусгайлан заагаагүй бол нутгийн өөрөө удирдах байгууллага Үндсэн хуулинд нийцүүлэн бие даан шийдвэрлэж болно” гэж заасныг үндэслэн аймгийн Иргэдийн төлөөлөгчдийн хурлаас баримталж буй бодлогод тулгуурлан сумын Иргэдийн Төлөөлөгчдийн Хурлаас сумынхаа эдийн засаг, нийгмийн хөгжлийн 2017-2020 онд хүрэх түвшинг тодорхойлсон энэхүү бодлого, үзэл баримтлалыг гаргаж байна.

Бүрэн эрхийн хугацаанд баримтлах бодлого маань сум орон нутгийн хөгжлийн тогтвортой байдал, нийгмийн салбарын хэвийн үйл ажиллагааг хангах, иргэдийнхээ аж амьдралыг сайжруулан үр дүнгээ тодорхойлох бодлогын баримт бичиг байна.

Сумын ИТХ-ын эрхэм зорилго

Нутгийн өөрөө удирдах байгууллагыг төлөвшүүлэн бэхжүүлэх, Хөдөө аж ахуй, Уул уурхай болон бүсчилсэн хөгжлийн бодлогод тулгуурлан сумын эдийн засаг, нийгмийн тулгамдсан асуудлыг иргэдийн идэвхтэй оролцоонд түшиглэн орон нутгийн нөөц боломжоо дайчлан шийдвэрлэж, төрийн болон иргэний нийгмийн байгууллага, баялаг бүтээгчдийн хамтын оролцоотойгоор орон нутгийн тогтвортой хөгжлийг хангах явдал юм.

Нэг. Орон нутгийн нийгмийн хөгжлийн хэтийн төлөвийг тодорхойлж, ажил, орлоготой гэр бүл, эрдэм боловсролтой авьяаслаг хүүхдүүд, эрүүл чийрэг Гурвантэсчүүд байхын төлөө түүнийг хэрэгжүүлэхэд ИТХ, төрийн болон иргэний нийгмийн байгууллагуудын хамтын үйл ажиллагааг чиглүүлэн ард иргэдийн оролцоог нэмэгдүүлж иргэдээ аюулгүй, цэвэр, эрүүл орчинд амьдарч ажиллах нөхцлийг бүрдүүлэх

1.1 Боловсролын салбарыг нийгмийн хөгжлийн тэргүүлэх салбар гэж үзэж хүүхэд нэг бүрийг хөгжүүлэх, монгол ёс заншлаа дээдлэх, эх хэлээ төгс эзэмших, эх оронч, итгэл даах чадвартай, боловсролтой, хүрээлэн буй орчноо хамгаалах хүмүүжилтэй иргэн болгон төлөвшүүлэхэд анхаарах

1.2 Боловсролын цөм хөтөлбөрийн хэрэгжилт, сургалтын чанарыг сайжруулах, багш нарын ур чадварыг дээшлүүлэх, хөгжлийн бэрхшээлтэй хүүхдийн сурах орчинг бүрдүүлэх

1.3 Эрүүл мэндийн байгууллагын үйлчилгээний чанарыг сайжруулах, эх хүүхдийн эрүүл мэндийг хамгаалах, иргэдийн эрүүл мэндийн боловсролыг дээшлүүлэх, нийтийн биеийн тамир спортыг дэмжих, хүрээлэн буй орчны сөрөг нөлөөллийг бууруулах, эмч эмнэлгийн ажилтны чадамж, харилцаа, хандлага, удирдлагын тогтолцоог сайжруулах

1.4 Сумынхаа үнэт зүйлс, бахархалыг тодорхойлон, говийн онцлог давтагдашгүй өв соёлыг хамгаалах, түгээн дэлгэрүүлэх, алдар гавьяат түүхэн хүмүүсээ алдаршуулах ажлыг

зохион байгуулах, хүүхэд, залуучуудад эх орон, хил хязгаарын үнэ цэнэ нутаг орноороо бахархах үзлийг бий болгож төлөвшүүлэх

1.5 Ахмад болон хөгжлийн бэрхшээлтэй иргэдийн нийгмийн хангамжийг сайжруулах, тэдний хөдөлмөр эрхлэлтийг дэмжих, өрх гэр бүлийн хөгжил, залуучуудын хөдөлмөр эрхлэлт, нийгмийн оролцоог дэмжиж ажилтай иргэн, орлоготой өрхийн тоог нэмэгдүүлэх

Хоёр. Бүс нутгийн хөгжлийн чиг хандлагад тулгуурлан сумын эдийн засаг, хөрөнгө оруулалтыг оновчтой шийдвэрлэх, тогтвортой хөгжлийг хангах, дэд бүтцийг сайжруулах уул уурхайн төслүүдийн нийгмийн хариуцлагыг дээшлүүлэх, ажлын байр нэмэгдүүлэхэд чиглүүлэх, орон нутгийн өмчийн бүртгэл, ашиглалт хамгаалалтыг сайжруулах зорилтыг шийдвэрлэх

2.1 Эдийн засгийн хөгжилд хариуцлагатай уул уурхай, хөдөө аж ахуй, аялал жуулчлалыг хослуулан хөгжүүлэх, уул уурхайн томоохон төслүүдийг тогтвортой ажлын байр бий болгох, малчдыг дэмжих, дэд бүтцийг хөгжүүлэх, жижиг дунд үйлдвэрлэл эрхлэгч аж ахуйн нэгжүүдийг дэмжих замаар ажлын байрыг нэмэгдүүлэх

2.2 Орон нутгийн бие даасан байдлыг бэхжүүлэх, орлогын эх үүсвэрийг нэмэгдүүлэх, төсвийн болон орон нутгийн хөгжлийн сангийн үйл ажиллагааны гүйцэтгэлийг сайжруулахад хяналт тавьж, төсвийн сахилга батыг дээшлүүлэх

2.3 Орон нутгийн чанартай автозамыг нэмэгдүүлэх, арчлан хамгаалах, цэвэр бохир ус, цахилгаан, дулааны шугам сүлжээг нэмэгдүүлэх, иргэдийг орон сууцжуулах төсөл хөтөлбөрийг дэмжиж бага дунд орлоготой иргэдийг хамруулах, амьдрах орчин сайжруулах

2.4 Говь нутгийн байгалийн дахин давтагдашгүй унаган төрх, усны нөөц, ургамлыг хамгаалах, нөхөн сэргээх, ногоон байгууламжийг нэмэгдүүлэх, хүн амын ундны усны чанарыг сайжруулах

2.5 Уул уурхайн нөлөөллөөс үүсч буй тоосжилт, байгаль экологи, хүн амын эрүүл мэндэд хор нөлөөгүй дэвшилтэт технологи нэвтрүүлэх, иргэддээ экологийн боловсрол олгох

2.6 Сумын төвийн эрчим хүчний хүчин чадлыг нэмэгдүүлэх, дулаан хангамж, харилцаа холбоо мэдээллийн сүлжээний хүртээмжийг сайжруулж, үнийн уян хатан бодлогыг баримтлах

2.7 Говийн булаг шанд гүний усыг ашиглан усалгаатай газар тариалан эрхэлж хүнсний ногоо, малын тэжээлийн ургамал тариалах, хүлэмжийн аж ахуйг дэмжих, малын тоог чанарт шилжүүлэх, мал сүргийг эрсдэлээс хамгаалах, малчны хөдөлмөрийг хөнгөвчлөх дэвшилтэт технологи нэвтрүүлэх

2.8 Нутаг дэвсгэрийнхээ хөгжлийн бодлогыг тодорхойлоход эрдэмтэн, шинжээчид, нутгийн иргэд, ахмадууд, мэргэжилтнүүдийн саналыг тусгах, хөрш зэргэлдээ гадаад улс орнуудын эдийн засаг нийгэм, хөдөө аж ахуй, байгаль орчны чиглэлээр туршлага судалж хэрэгжүүлэх

2.9 Суманд аялал жуулчлалын сүлжээг өргөжүүлэх, байгалийн үзэсгэлэнт, түүхэн дурсгалт газруудыг хамгаалах, дэд бүтцийг сайжруулах, жуулчдын ая тухтай аялах нөхцлийг бүрдүүлэх, жуулчдыг татах гадаад дотоодын хөтөлбөр төслүүдийг дэмжих

2.10 Төрийн болон төрийн өмчийн оролцоотой аж ахуйн нэгж байгууллагуудын өмч хөрөнгийн хадгалалт, хамгаалалт, зарцуулалт, ашиглалт, худалдан авалтанд байнгын хяналт тавих

Гурав. ИТХ-ын байгууллагын бие даасан байдал, үйл ажиллагааны чадавхыг дээшлүүлэх, нутгийн өөрөө удирдах байгууллага, нутгийн захиргааны байгууллагын хамтын үйл ажиллагаа, төрийн ухаалаг үйлчилгээ, ил тод байдлыг сайжруулах, иргэдийг мэдээллээр хангах боломжийг нэмэгдүүлнэ.

3.1 Хурлын байгууллагын бие даасан байнгын ажиллагаа, эрх зүйн чадамж, бааз суурийг бэхжүүлэх, боловсон хүчнийг мэргэшүүлэх, Төлөөлөгчдийг чадавхижуулах, сургах, бусад аймаг, сумдуудын туршлагаас суралцах, боломжийг судлан хэрэгжүүлэх

3.2 Хурлын байгууллагын байнгын үйл ажиллагааг сайжруулах зорилгоор автомашинтай болох

3.3 Иргэний танхимын үйл ажиллагааг тогтмолжуулж, иргэдийн өргөдөл гомдол, саналыг шуурхай хүлээн авч эргэх холбоотой байх, ТББ, сүм хийдүүдтэй хуулийн хүрээнд идэвхитэй харилцах зэрэг шийдвэр гаргах түвшинд иргэдийн оролцоог нэмэгдүүлэх

3.4 Иргэдэд шаардлагатай хууль тогтоомж болон хурлын шийдвэрийг иргэдэд тайлбарлан таниулж сурталчлах

3.5 Сумын ИТХ-ын хуралдаан, Тэргүүлэгчдийн хурлын шийдвэрийн хэрэгжилтийн явц, үр дүнг сумын ЗДТГ, албан байгууллагууд эргэн мэдээлэх, нутгийн өөрөө удирдах байгууллагын ажлын уялдааг сайжруулах

3.6 Багийн Иргэдийн нийтийн хурлыг чадваржуулах, тулгамдсан асуудлаа иргэд өөрсдөө шийдвэрлэх нөхцлийг бүрдүүлэх, мэдээлэл хүргэх, мэдээллийн сүлжээг өргөжүүлэх

3.7 Төрийн албаны ажилтнуудын мэргэжил ур чадварыг дээшлүүлэх, хариуцлагатай, ёс зүйтэй ажиллах, төрийн албыг хүнд сурталгүй байлгаж авлигатай тэмцэхэд хурлын ажлыг чиглүүлэн, хяналтын чиг үүргийг сайжруулах, иргэдэд нээлттэй ил тод байх, иргэн төвтэй төрийн үйлчилгээг дээдлэх бодлого баримтлах

3.8 Хурлын дэргэдэх гэмт хэргээс урьдчилан сэргийлэх зөвлөлийн үйл ажиллагааг тогтмолжуулж идэвхитэй ажиллуулах

3.9 Иргэдийн төлөөллийн байгууллагын хувьд Төлөөлөгчдийг сонгогдсон тойрогтоо ажиллах нөхцөл боломжийг бүрдүүлэх, Хурлын үйл ажиллагааг орон нутгийн мэдээллийн хэрэгслээр сурталчлах, иргэдийн оролцоо, дуу хоолойг сонсож хурлын нээлттэй байх зарчмыг хэрэгжүүлэх

3.10 Иргэдийн амгалан тайван ажиллах, амьдрах нөхцлийг бүрдүүлэх, гэмт хэрэг, ашиг сонирхолын зөрчил, хар тамхи мансууруулах бодис, архи дан согтуурахаас урьдчилан сэргийлэх үйл ажиллагаанд хууль хяналт, иргэдийн хамтын ажиллагааг сайжруулах

Биелэлтийг хянах, дүгнэх:

Энэхүү үзэл баримтлалын хэрэгжилтийн явцыг тайлагнах үүргийг сумын ИТХ-ын Тэргүүлэгчид, түүний ажлын алба хариуцах ба хэрэгжилтийг сумын Иргэдийн Төлөөлөгчдийн хуралдаанаар 2 жилд нэг удаа хэлэлцэж, үнэлэлт дүгнэлт өгөх бөгөөд шаардлагатай гэж үзсэн тохиолдолд хуралдаанаар нэмэлт өөрчлөлт оруулж болно.